


O TONI, LE TAMA'I SOLOFANUA FAI PATI

Tala na saunia e John Carr
Ata Michael Wilkin




O Toni, le Tama'i
Solofanua fai Patī



Mataupu 1

O le lona fā ai lea o patī o aso fanau sa auai atu iai Toni i totonu o aso e lua, ma na matuā vaivai ai lava. Na tiga ona atigivae, gagase ona vae ma fufusi foi le fusipau lea e fusi ai le nofoa i lona fatafata. Na oloia ai ma mafo'e le pito i luga o lona vae i luma lea e tiga i taimi uma e minoi ai.

Sa tietie ma osooso ai se tamaititi lapoa i luga o lona papatua. Na toso faamalō e le tamaloa o loo fai lona pulou vaivai, le maea ina ia faavave ai le savali a Toni. Ae sa lē mafai se mea i le tiga o ona vae. Sa manao lava e tuu loa ae se'i fai sana malologa ma ua fia inu, ae sa lē mafai. Sa lē manao le tamaloa faipulou vaivai e taofi se'iloga e uma ona faatietie tamaiti.



Mataupu 2

Ina ua alu ese i lalo le tamaitiiti lapoa, ua fiafia nei Toni auā ua toe toatasi le tamaitiiti lea e faatali e tietie. O le teineitiiti mata 'ata'ata sa fai ona seevae soloatoa lanu violē.

“O a'u lea laa alu,” o le fai atu fiafia lea a Samara i lona tamā. Ua leva ona ia faatalitali ma o le taimi muamua lea o le a tietie ai i se tama'i solofanua e ta'ua o le Shetland.

E lei musu le teineititi ona o le tamaloa foliga faalii lea e ta'ita'ia le tama'i solofanua, ae na musu ona o le vaai atu i le tau 'etu'etu o si tama'i solofanua.

“Tamā, vaai i si mea o lea e tiga lona vae,” o le tala lea a Samara. “Leiloa pe na 'ai e se pi!”

“O la'u vaai atu e foliga ua pala lona atigivae,” o le tala lea a le tamā o Samara, auā e iai sona malamalamaaga i solofanua. “E pala o latou atigivae pe afai e lē o tausia lelei. O le mafuaaga lena ou te siakiina ai ma salusalu faamamā atigivae o Sutana i vaiaso taitasi.”



“Faatope ae oso i luga,” o le tala lea a le tamaloa. “O lea alu le taimi. E fai o le faigata o le sailiga o tupe i se tama'i solofanua faiaga faapenei, ae o le fiu foi i le faifaiaga o tamaiti latou.”

“E lē mafai ona ou tietie ai pe afai o loo tiga lona vae,” o le tala lea a Samara. “O se lē alofa lena mea.”

“Leai se mea e leaga ai,” o le tala lea a le tamaloa. “E vave ai foi ona ou alu ese ma i.”

Ua alofa lava Samara i si tama'i solofanua. Sa tago atu ma pōpō mālie lona itu. Na faafuasei ona 'i'i le tama'i solofanua ma solomuli ese atu.

Na tago faavave atu le tamā o Samara ma toso ese mai lona afafine. Na maofa foi o ia e pei o Samara i le gaoioiga a le tama'i solofanua lea na fai ane. Ae ina ua ia iloa atu le mafo'e o le pa'u i le itu o le tama'i solofanua, sa ia malamalama ai loa i le mafuaaga.



“E manaomia e si tama'i solofanua lenei se vaaia lelei,” o le tala lea a le tamā o Samara i le tamaloa. “O loo matuā tiga lona tino ma e na te manaomia se foma'i manu.”

“E lē o tiga, o ia lea e faatiga mai,” o le tala lea a le tamaloa. “Aua le popole, o le a ou matuā vaaia lelei pe a toe fai lana mea lea!”

Sa tilotilo atu Samara ma lona tamā a'o toe ta'ita'i atu e le tamaloa le tama'i solofanua i le taavale solofanua. Na alu ese atu le taavale a le tamaloa e aunoa ma sona aveinoa o se vai e faainu ai si tama'i solofanua pe tatala ese foi lona nofoa.

Sa faanoanoa lava ma fefe foi Samara.

“Talofa e, i si tama'i solofanua,” o lana tala lea, “O le ā se mea e mafai ona ta faia?”

“Aua e te popole, o lea na ou pueina le ata o le taavale solofanua,” o le tala lea a Tamā.



Mataupu 3


O le pa manu a Toni e sosoo ma se fale sa tu i le faatausiuga lava o se ala taavale umi. Sa lei iai iina le taavale a le tamaloa faipulou vaivai, ma sa fialia ai Toni i lena mea. Lona uiga e leai ni pati o ni aso fanau i lenei aso. O le a mafai ai ona se'i faamalolō ona atigivae ua tiga lava ma ona vae ua lēlavā.

E laitiiti le pa manu ma sa leai se fale e faamalumu ai mai le timu. A'o taoto i luga o le palapala, o loo susū, ua fia'ai ma lēlavā, ae ia faalogoina loa se taavale o loo agai atu i le latou auala taavale.



Sa lei masani Toni i le avetaavale, ae na ia iloa mai le 'ata'ata ma le leo faaleuō, e lē o le tamaloa faipulou vaivai lea e alu atu. Sa tau tevateva lana tu i luga. E lei vaai muamua lava i lenei tagata ae na faate'ia foi i le faalogo mai o ta'u lona igoa.

“Talofa Toni, o a'u o Peti mai le SPCA,” o le tala lea a le tagata. “Sa telefoni atu nisi mai lo tatou pitonuu o ē na popole ia te oe ma ou te fia fesoasoani atu e laveai oe.”



Mataupu 4

E lei vaai muamua lava Samara i le SPCA ma sa fiafia ai lava. O lea o le a alu e asiasi i le fale o le tama'i solofanua ua ta'ua o le Shetland lea na vili iai lona tamā i le SPCA i ni nai masina ua tuanai. O le ata o le taavale solofanua lea na ia lafoina sa faigofie ai mo le tagata asiasi a le SPCA ona sue le tama'i solofanua.

O lea la ua tausī nei Toni e le SPCA ma sa faatalitali ai iinā mo sona aiga fou.

"O lea e see o'u seevae soloatoa lanu violē ina ia mafai ai ona ia maitaulia mai a'u," o le tala lea a Samara a'o oso ese i fafo mai le taavale.

"Manuia," o le tala lea a Tamā, "sa ou manatu ai nei e faigata ia te oe ona maitaulia o ia."



Na sa'o lava Tamā. A'o la mulimuli atu ia Peti e agai atu i le pa manu, na faate'ia Samara i le matuā ese o foliga o Toni lea ua iai. Ua mamā ma iila lona tino, ua lē o toe 'etu'etu lana savali, ua pē le mafo'e lea sa i lona itu, ma na fe'ilafi mai ona mata i le fiafia o se mea sa lei vaaia muamua e Samara.

"E ese le aulelei," o le tala lea a Samara, "ma ua foliga fiafia foi."

"E ese le maoa'e o mea e mafai ona fai pe a iai sina tausiga ma le vaaiga lelei," o le tala lea a Tamā.

"Sa matou ta'oti ona atigivae ma togafiti le atigivae lea na leaga," o le tala lea a Peti. "O lea ua tele ana vai mamā e inu, o mea'ai lelei ma se mea e faamalumalu ai. O ona nifo foi sa avea ma faalavelave ia te ia, ae ua uma ona toe faatulaga lelei e le foma'i manu. Ua pei lava o se tama'i solofanua fou. Pau lava le mea o loo ia mandomia nei o sona aiga fou."



Na lē pisa Samara a'o ia milimiliina le muāisu o Toni. Sa lei manaomia ona faia sana tala auā na iloa lelei lava e Tamā le mea lea ua mafaufau iai le teineitiiti. Sa pōpō atu e lona Tamā lona tau'au.

“O le tausiga o se tama'i solofanua o se tiute tauave telē,” o lana tala lea. “Ou te manatu e tataua ona faatali se'i e tau matua teisi.”

Sa faanoanoa Samara ae na taumafai e aua ne'i faaalua atu. Sa fiafia ona o lea ua malosi lelei Toni. Sa faamoemoe le teine talosia ia pei le lelei o sona aiga fou o le a alu iai, e pei o le lelei lea o loo tausii ai o ia i le SPCA.



Mataupu 5

Na iloa e Toni ina ua tata'i atu o ia e Peti i le taavale solofanua, o lea o le a alu i se aiga fou. Sa popole ma faanoanoa auā o le a ia tuua le SPCA.

O le iai i totonu o le taavale solofanua a'o salukuluku solo ma feluea'i a'o alu atu i le auala, na ia toe manatua ai taimi uma sa ave ai o ia i patī o aso fanau e le tamaloa faipulou vaivai. Ona popole lea.

Na atili ai le popole o Toni ina ua faalogo atu ua tū le taavale. Na te lei iloa poo fea lea ua iai, ae sa mafai ona ia lagona atu se leo sa faalogo soo iai muamua.

Ia Manuia lou Aso Fanau.

Ia Manuia lou Aso Fanau....



A'o tata'i mai Toni i lalo o le auala mai le taavale solofanua, sa ia vaaia le teineitiiti ma ona seevae soloatoa lanu violē. Sa matuā faate'ia Samara e pei foi o le faate'ia o Toni, e ui lava e foliga mai sa iloa e ana uō le mea lea o loo tupu.

"Surprise!" o a latou tala ia.


Na savali atu Samara ia Toni ma fusi mai.

"Tamā, o lona uiga la o lea o le a fai Toni ma a'u tama'i solofanua?" o lana fesili lea.

"Sa'o lelei," o le tala lea a Tamā, "pe afai lea e te tausia lelei o ia. E mafai ona la nonofo faatasi ma Sutana i le pa pito i luga, ma o loo iai foi le avanoa mo se isi potu e fai i totonu o le falemanu."

"Ae o ananafi lea na e fai mai ai ia te au e tatau ona ou faatali se'i o'u tau matua teisi."

"Sa'o lelei," o le 'ata lea a Tamā, "ae o ananafi e tasi le tausaga sa e laitiiti ai."



Tausiga o Tama'i Solofanua

- E manaomia lava e tama'i solofanua le tausiga ma le vaaiga lelei e tagata, ma e e latou te fiafia ai lava. Peitai latou te manaomia sina taimi e faatuputupu a'e ai le latou faatuatuaga.
- E manaomia ona tausī tama'i solofanua i totonu o se pa ua puipui lelei ma iai ni vao fou, se vai fou ma ia lava se paolo e faamalumu ai ma se puipuiga mai le matagi. E latou te manaomia foi le tele o ni vaovao mamago ma se fata e tuu ai i totonu ina ia lē solia ai le palapala.
- E fiafia foi tama'i solofanua pe a teuteu lelei o latou tino. E mafai ai ona aveese ni palapala ma pefu, e fesoasoani i le fegasoloa'i o le toto i totonu o le tino ma aveese ai mea ua mamago ma mea faapepē o lona tino. O nisi tama'i solofanua e fiafia pe a faapasī iai le faaga'au e fui ai le tino i taimi o le taumafanafana pe a oo ina vevata tele. I le taumālūlū, e latou te ono manaomia se palanikeke e faapulupulu ai mai le mālūlū.
- E mafai ona tutū tama'i solofanua ma taagugulu, ae manaomia lava ona taoto i lalo e mālūlū ma momoe lelei i nisi taimi.
- E manaomia ona siaki soo nifo o tama'i solofanua auā e faaauau lava ona tutupu o latou nifo!

**Asiasi i le kids.spcaeducation.org.nz e te iloa atili ai isi
mea e uiga i le tausiga o tama' i**

Toni, the Party Pony

© 2017 Society for the Prevention of Cruelty to Animals Education, Auckland, New Zealand

Published by Wendy Pye Publishing Limited for SPCA Education

Text by John Carr

Illustrations by Michael Wilkin

This Samoan edition published 2019

ISBN: 978-1-98-857830-9

All rights reserved. No part of this publication may be reproduced or transmitted in any form or by any means, electronic or mechanical, including photocopy, recording or any information storage and retrieval system, without permission in writing from the publishers.

Distributed in New Zealand by The SPCA

3047 Great North Road, New Lynn, Auckland 0640, New Zealand